

死匈奴用事大臣右骨都侯須卜當卽王昭君女伊墨

居次云之壻也云常欲與中國和親又素與咸厚善見

咸前後為莽所拜故遂越輿而立咸為烏累若鞮單于

師古曰累音力追反烏累單于咸立以弟輿為左谷蠡王烏珠留

單于子蘇屠胡本為左賢王以弟屠耆闕氏子盧渾為

右賢王師古曰渾音胡昆反烏珠留單于在時左賢王數死以為

其號不祥更易命左賢王曰護于護于之尊最貴次當

為單于故烏珠留單于授其長子以為護于欲傳以國

咸怨烏珠留單于貶賤已號不欲傳國及立貶護于為

左屠耆王云當遂勸咸和親天鳳元年云當遣人之西